

每週經課朗誦經文(巴克禮漢羅/教羅)2012/12/24

共同經課 - 1 以賽亞書九章二節～七節

2 行 tī 烏暗中 ê 百姓看見大光；khia̍ 起 tī 死蔭 ê 地 ê，有光照 in。3 你 hó chit-ê 國民 choē-choē，亦加添 in ê 歡喜；in tī 你 ê 面前歡喜，親像收割 ê 歡喜，親像人分所搶 ê 物，hit 號 ê 快樂。4 因為伊所背重 ê 擔，kap 肩頭頂 ê 拐，以及壓制伊 ê 槌，你 lóng kā 伊 at 折，親像 tī 米甸 ê 日一樣。5 因為交戰中穿甲 ê 人 ê 跟蹤，kap kō tī 血內 ê 衫 lóng beh 受燒，做 hiáⁿ 火 ê 柴。6 因為有一個嬰 á 為咱來出世，有一個 kiáⁿ 賞賜咱；伊 beh 負擔國政，伊 ê 名稱做奇妙，謀事，全能 ê 上帝，永遠 tī-teh ê 父，和平 ê 人君。7 伊 ê 國政 kap 平安 beh 加添無窮盡，就是 tī 大衛 ê 寶座 kap 伊 ê 國，beh 用審判公義來建立伊，保護伊，tùi taⁿ 到永遠。萬軍 ê 耶和華 ê 熱心 beh 成 chit-ê 事。

共同經課 - 2 詩篇九十六篇

1 Lín tiòh òng 耶和華唱新 ê 歌，全地 lóng tiòh òng 耶和華唱歌。2 Tiòh òng 耶和華唱歌，祝謝伊 ê 名；日日傳報伊 ê 救恩。3 Tī 列邦 ê 中間講起伊 ê 榮光；Tī 萬百姓 ê 中間講起伊奇妙 ê 所做。4 因為耶和華最大，應該受極大 ê o-ló；伊 tī 眾神明 ê 頂面應該受敬畏。5 因為列邦 ê 上帝 lóng 是虛假；獨獨耶和華創造 chiah-ê 天。6 Tī 伊 ê 面前有尊貴 kap 威嚴；Tī 伊 ê 聖所有權能 kap 榮光。7 百姓中 ê tàk 族 ah，lín tiòh 將權能榮光，歸 hō 耶和華；歸 hō 耶和華。8 用伊 ê 名所應該得 tiòh ê 榮光，歸 hō 耶和華；帶禮物來入伊 ê 院。9 Tiòh 用聖潔 ê 裝飾敬拜耶和華；全地 tī 伊 ê 面前 ngiauh-ngiauh-chhoah。10 Tī 列邦中 tiòh 講，耶和華做王，世界堅固，boē 搖動；伊 beh 照公平審判萬百姓。11 願天歡喜，地快樂；願海 kap 其中所充滿 ê lóng 出大聲；12 願田園 kap 其中所有 ê lóng 快樂；Hit 時樹林內 ê 樹木 lóng beh tī 耶和華 ê 面前出歡喜 ê 聲；13 因為伊來 lah，伊來 beh 審判全地；伊 beh 照公義審判世界，照伊 ê 信實審判萬百姓。

共同經課 - 3 提多書二章十一節～十四節

11 因為上帝救眾人 ê 恩已經顯明，12 警戒咱 tiòh 棄 sak 不虔 kap chit 世間 ê 私慾，用守己、公義、敬虔來過日 tī chit 世代；13 欣慕 hit-ê 大福氣 ê òng 望，kap 咱至大 ê 上帝 kap 救主耶穌基督榮光 ê 顯現。14 伊為 tiòh 咱獻家己，beh 贖咱脫離一切 ê 不法；koh 為 tiòh 本身洗清咱做伊家己 ê 百姓，就是熱心 tī chiah-ê 好所行 ê。

共同經課 - 4 路加福音二章一節～二十節

1 當 hit 時該撒 A-kó-sū-tok 有出詔，命令天下 lóng 造家甲。2 這頭一 pái ê 家甲是 Ku-lí-liú 做敘利亞總督 ê 時來做 ê。3 眾人去造家甲，tàk 人 tò 去本城。4 約瑟 ê 世系屬 tī 大衛 ê 家，所以 tùi 加利利 ê 拿撒勒城上去猶太，到大衛 ê 城，名叫伯利恆 ê，beh kap 伊所聘定 ê 馬利亞 saⁿ-kap 造家甲；5 hit 時馬利亞已經有身孕。6 In tī hia ê 時，生產 ê 期到。7 就生頭 chiūⁿ kiáⁿ，用布包伊，hō 伊暍 tī 槽裡；因為客館無所在 thang 容允 in。8 Hit 地方有顧羊 ê toà tī 山裡，暝時守更顧 in ê 羊群。9 主 ê 天使 khia̍ tī in ê 身邊，主 ê 榮光圍纒照 in；顧羊 ê 大驚。10 天使 kā in 講，莫得驚；因為我報 lín 大歡喜 ê 好消息，hō 百姓 lóng 有份；11 因為今 á 日 tī 大衛 ê 城已經為 tiòh lín 生一個拯救 ê，就是主基督。12 Lín beh 看見一個嬰 á 用布包，暍 tī 槽裡 ê，chit-ê 就是 hō lín 做記號。13 忽然有 choē-choē 天兵 kap hit-ê 天使 saⁿ-kap tī-teh，o-ló 上帝，講，14 Tī 極高位榮光歸 tī 上帝，地上和平 tī 伊所歡喜 ê 人 ê 中間。15 Chiah-ê 天使離開 in 上天 ê 時，顧羊 ê saⁿ-kap 講，Taⁿ 咱來去伯利恆，看所成 ê 事，就是主所報咱知 ê。16 就緊緊去，chhē-tiòh 馬利亞 kap 約瑟，koh 看見嬰 á 暍 tī 槽裡。17 看了，就將天使所對 in 講 chit-ê 嬰 á ê 事報人知。18 聽見 ê 人 lóng 奇怪顧羊 ê 所對 in 講 ê 事。19 獨獨馬利亞將 chiah-ê 話記 tiâu-tiâu，心內常常 teh 想。20 顧羊 ê tò 去，為 tiòh 所聽見 ê，所看見 ê，就是天使所對 in 講 ê，來歸榮光 o-ló 上帝。